

# Ikan yu paus masuk pukat nelayan di Pulau Kapas

UM 26/8/24 pg 35

**KUALA TERENGGANU:** Jabatan Perikanan Negeri Terengganu mengesahkan penemuan seekor ikan yu paus atau nama saintifiknya *Rhincodon Typus* di perairan Pulau Kapas, dekat Marang seperti yang tular dalam media sosial, baru-baru ini.

Pengarahnya, Ruzaidi Mamat berkata, ikan tersebut terperangkap ketika nelayan sedang menangkap ikan menggunakan pukat jerut.

Katanya, jabatan itu telah menghubungi nelayan terlibat dan dimaklumkan kejadian berlaku pada 11 Ogos lalu.

"Seekor ikan yu paus memasuki pukat namun tekong dan awak-awak mengeluarkannya daripada terperangkap.

"Kejadian itu dirakam kerana ia adalah pertama kali ikan tersebut masuk ke dalam pukat jerut dan dimuat naik dalam aplikasi TikTok untuk berkongsi pengalaman dengan ikan yu paus," katanya ketika dihubungi di sini, semalam.

Ruzaidi memuji langkah nelayan terlibat menyelamatkan spesies tersebut.

Jelasnya, yu paus adalah antara haiwan yang tersenarai di bawah Spesies Ikan Yang Dilindungi Di Bawah Peraturan-Peraturan Perikanan (Penggawalan Spesies Ikan Yang Terancam) 1999, Akta Perikanan 1985.

Menurutnya, sebarang kesalahan melibatkan senarai ikan terancam boleh dikenakan maksimum denda RM20,000 atau penjara maksimum dua tahun atau kedua-duanya sekali jika sabit kesalahan.

Baru-baru ini, tular video di TikTok yang memaparkan sekumpulan nelayan menyelamatkan yu paus yang dipercayai terperangkap dalam pukat mereka.

Dua video berdurasi satu minit 41 saat itu menerima lebih 1.2 juta tontonan dan dikongsi ribuan pengguna TikTok lain.